



高麗史

列傳

五十五

リ伊C
2.807
35



特
門戶伊6
種 2809
卷 55



列傳卷第一

高麗史八十八

二行亦故

正憲大夫工曹判書集賢殿太提學知 經進奉教館事兼成均司成臣鄭麟趾奉

教修

后妃

三子下廿一分

高麗之制王母稱王太后嫡稱王后妾稱夫人貴妃淑妃德妃賢妃是為夫人秩並正一品自餘尚宮尚寢尚食尚針皆有負次靖宗以後或稱宮主或稱院主或稱翁主改復不常未可詳也太祖法古有志化俗然狃於土

三子下廿一分

習以子聘女諱稱外姓其子孫視為家法而不之恠惜哉蓋夫婦人倫之本也國家理亂罔不由之可不慎歟故作后妃傳而嬪嬙夫人并各附于其次

太祖神惠王后柳氏貞州人二重大匡天弓之女天弓家大富邑人稱為長者太祖事弓裔為將軍引兵過貞州息馬古柳下后立路傍川上見其有德容問汝誰氏女對曰此邑長者家女也太祖因至宿焉其家饗一軍甚

豐以后侍寢厥後絕不相聞后守志貞潔削髮為尼太祖聞之召以為夫人弓裔末洪儒裴玄慶申崇謙卜智謙詣太祖第將議廢立不欲今后知之謂后曰園中豈有新瓜乎可摘來后知其意出從北戶潛入帳中於是諸將遂言推戴之意太祖作色拒之甚堅后遽從帳中出謂太祖曰舉義代虐自古而然今聞諸將議妾猶奮發况大丈夫乎手提甲領以被之諸將扶擁而出遂即位太祖十六年

後唐明宗遣太僕卿王瓊等來冊后官告曰
爲人之妻能從夫以貴者是爲宜其家矣封
邑之制彝典所垂俾增伉儷之光以稱國君
之爵大義軍使特進檢校太保使持節玄菟
州都督上柱國高麗國王妻河東柳氏內言
必正同獎固多贊虎幄之嘉謀保魚軒之寵
數輔成忠節諒屬柔明爰降殊榮載踰常等
勉助勤王之志是謂報國之規可封河東郡
夫人薨謚神惠王后祔葬顯陵

莊和王后吳氏羅州人祖富侗父多憐君世
家州之木浦多憐君娶沙干連位女德交生
后后嘗夢浦龍來入腹中驚覺以語父母共
奇之未幾太祖以水軍將軍出鎮羅州泊舟
木浦望見川上有五色雲氣至則后浣布太
祖召幸之以側微不欲有娠宣于寢席后即
吸之遂有娠生子是爲惠宗面有席紋世謂
之禰主常以水灌寢席又以大瓶貯水洗臂
不厭真龍子也年七歲太祖知有繼統之德

恐母微不得嗣位以故笥盛柘黃袍賜后后示大匡朴述熙述熙揣知其意請立爲正胤后薨謚莊和王后

神明順成王太后劉氏忠州人贈太師內史今兢達之女生太子泰定宗光宗文元大王貞證通國師樂浪興芳二公主薨謚神明順聖太后

神靜王太后皇甫氏黃州人太尉三重匡忠義公悌恭之女生戴宗及大穆王后初封

明福宮大夫人成宗二年七月薨成宗早喪宣義太后長於后故哀慕盡禮率百僚臨于殯殿上謚曰神靜大王太后冊文曰德侔附寶功比姜嫄曾表異於手文亦炳靈於胎教端逢聖祖始卜好速膺妙選於六宮贊昌基於庶政克修婦道爰備坤儀節儉之風行乎閨闈箴規之義播在朝廷樊姬之不食鮮禽楚王改過衛女之不聽淫樂齊主知非矧乃辟輦之謙群情所伏破環之智列辟攸尊霸

高麗史卷八十八
四
業之興由其儆誠洪岳之盛仗乃賢謀族屬
駕在商山天崩祀國嫠居四紀鞠育諸孫名
在景鍾事光彤管顧惟眇質早遘閔凶纔當
齟齬之年既違慈母比及幼冲之歲又喪嚴
親便歸祖妣之懷中似接高堂之膝下旨甘
輟口每加吐哺之恩軟暖附身幾沐字孤之
惠蓋因撫養以至長成幸承門蔭之功叨獲
禪傳之位欲報祖先之德誓輸孫子之誠豈
期太史書氛靈臺告禋松齡未享蘭質俄捐

卷八十八

魚軒靜兮鑑殿並空十亂缺兮百身難贖九
族茹靡依之歎衆民舍罔極之悲今則遠日
已臻玄宮欲闕啓殯堂兮殮儀必備仍泉隧
兮窆具將加特命禮官教徵茂實考前芳而
累行表徽號以易名今遣某官某謹上謚曰
神靜大王太后葬壽陵穆宗五年四月加謚
定憲顯宗五年三月加懿敬十八年四月又
加宣德文宗十年十月加謚慈景冊文曰鶯
石開祥鳩洲協德漲家成國內伸弼贊之勞

翼子謀孫旁及慈和之訓嬪風載肆王化由
宣所以契二儀合配之尊處百代不遷之廟
但臣因叨慶系彌注孝思奉群序以合升執
薄羞而親饋屬茲龜獻仍益鴻稱謹奉冊加
上尊謚曰慈景仁宗十八年四月加柔明高
宗四十年十月加貞平

神成王太后金氏新羅人匣千億廉之女新
羅王金傳遣使請降太祖待以厚禮使歸告
曰今王以國與寡人其爲賜大矣願結昏宗

別力

室以永甥舅之好傳報曰我伯父億廉有女
德容雙美非是無以備內政太祖遂取之生
安宗顯宗即位追謚神成王太后陵曰貞
貞德王后柳氏貞州人侍中德英之女生王
位君仁愛君元莊太子助伊君文惠宣義二
王后
獻穆大夫人平氏慶州人佐尹俊之女生壽
命太子貞穆夫人王氏溟州人三韓功臣太
師三重大匡景之女生順安王大妃東陽院

高麗史卷之十一
夫人庾氏平州人太師三重大匡黔弼之女
生孝穆太子義孝隱太子肅穆夫人史失其
姓氏鎮州人大匡名必之女生元寧太子天
安府院夫人林氏慶州人太守彥之女生孝
成太子琳珠孝祗太子興福院夫人洪氏洪
州人三重大匡規之女生太子稷公主一後
大良院夫人李氏陝州人大匡元之女大溟
州院夫人王氏溟州人內史令乂之女廣州
院夫人王氏廣州人大匡規之女小廣州院

夫人王氏亦規之女生子廣州院君東山院
夫人朴氏昇州人三重大匡英規之女禮和
夫人王氏春州人大匡柔之女大西院夫人
金氏洞州人大匡行波之女小西院夫人金
氏亦行波之女行波善射御太祖賜姓金太
祖幸西京行波率獵徒道謁請至其家留信
宿以二女各侍一夜後不復幸二女皆出家
爲尼太祖憐之召見曰爾等旣出家志不可
奪也命於西京城中作大小西院兩寺置田

民令各居之故稱大小西院夫人西殿院夫
人史失其氏族信州院夫人康氏信州人阿
冷起珠之女生一子早卒養光宗爲子月華
院夫人大匡英章之女史失姓氏小黃州院
夫人元甫順行之女史失姓氏聖茂夫人朴
氏平州人三重大匡智胤之女生孝悌孝明
二太子法登資利二君義城府院夫人洪氏
義城府人太師三重大匡儒之女生義城府
院大君月鏡院夫人朴氏平州人太尉三重大

大匡守文之女夢良院夫人朴氏平州人太
師三重大匡守卿之女海良院夫人海平人
大匡宣必之女史失姓氏

惠宗義和王后林氏鎮州人大匡曦之女太
祖四年十二月冊惠宗爲正胤以后爲妃生
興化君慶化宮夫人貞憲公主薨謚義和王
后葬順陵祔惠宗廟穆宗五年四月加謚成
懿顯宗五年三月加景信十八年四月加懷
宣高宗四十年十月加靖順

後廣州院夫人王氏廣州人大匡規之女清
州院夫人金氏清州人元甫競律之女宮人
哀伊主慶州人大干連又之女生太子濟明
惠夫人

定宗文恭王后朴氏昇州人三重大匡英規
之女薨謚文恭王后葬安陵祔定宗廟穆宗
五年四月加淑節顯宗五年三月加孝慎十
八年四月加景信後又加宣穆順聖文宗十
年十月加貞惠高宗四十年十月加安淑

別行

文成王后朴氏亦英規之女生慶春院君公
主一

清州南院夫人金氏元甫競律之女

光宗大穆王后皇甫氏太祖之女生景宗孝
和太子千秋寶華二夫人公主一光宗七年
命按檢奴婢辨其是非奴背主者甚衆陵上
之風大行人皆嗟怨后切諫之光宗不納薨
謚大穆王后祔光宗廟穆宗五年四月加安
靜顯宗五年三月加宣明十八年四月加懿

正後又加信敬文宗十年十月加恭平高宗四十年十月加靜睿

慶和宮夫人林氏惠宗之女惠宗二年王規譖王弟堯及昭有異圖惠宗乃以女妻昭以強其勢語在規傳

景宗獻肅王后金氏新羅敬順王之女也薨謚獻肅王后祔景宗廟穆宗五年四月加溫敬顯宗五年三月加恭孝十八年四月加良惠後又加懿穆順聖文宗十年十月加懷安

高宗四十年十月加仁厚

獻懿王后劉氏宗室文元大王貞之女

獻哀王太后皇甫氏戴宗之女生穆宗穆宗即位冊上尊號曰應天啓聖靜德王太后穆宗年已十八太后攝政居千秋殿世號千秋太后與金致陽通而生子欲以其子嗣王位時顯宗為大良院君太后忌之強令出家寓居三角山神穴寺時稱神穴小君太后屢遣人謀害一日使內人遺以酒餅皆和毒藥內

人到寺求見小君欲親勸食寺有僧輒匿小君於地穴中給之曰小君出遊山中安知去處耶及內人還散之庭中烏雀食而即斃凡忠臣義士尤所忌憚多以非罪陷之穆宗不能禁十二年正月千秋殿灾太后入長生殿後康兆殺致陽父子流太后親屬于海島又使人弑穆宗於是太后歸居黃州者二十一年顯宗二十年正月薨于崇德宮壽六十六葬幽陵

獻貞王后皇甫氏亦戴宗之女景宗薨出居王輪寺南私第嘗夢登鵠嶺旋流溢國中盡成銀海卜之曰生子則王有一國后曰我既寡何以生子時安宗第與后第相近因與往來通焉有娠彌月人莫敢言成宗十一年七月后宿安宗第家人積薪于庭而火之火方熾百官奔救成宗亦亟往問之家人遂以實告乃流安宗后慚恨哭泣比還其第纔及門胎動攀門前柳枝免身而卒成宗命擇姆以

養其兒是為顯宗顯宗即位追尊為孝肅王
太后陵曰元陵八年五月加惠順十二年六
月改惠順為仁惠十八年四月加宣容高宗
四十年十月加明簡

大明宮夫人柳氏宗室元莊太子之女

成宗文德王后劉氏光宗之女初適弘德院
君後配成宗薨謚文德王后祔成宗廟穆宗
五年四月加孝恭顯宗五年三月加順聖十
八年四月加英容後又加肅節文宗十年十

月加元獻高宗四十年十月加宣威

文和王后金氏善州人贈侍中元崇之女初
稱延興宮主或稱玄德宮主生貞元王后顯
宗二十年四月封為大妃九月贈元崇特進
守大尉兼侍中土柱國和義郡開國侯食邑
一千五百戶母王氏和義郡大夫人祖光義
尚書左僕射土柱國和義縣開國伯食邑七
百戶祖母金氏和義郡大夫人后薨謚文和
王后

土上

土上

高麗史卷之十八 十二
延昌宮夫人崔氏右僕射行言之女生元和
王后

穆宗宣正王后劉氏宗室弘德院君圭之女
薨謚宣正王后祔穆宗廟顯宗五年三月加
懿節後加安獻貞慎文宗十年十月加襄堅
高宗四十年十月加元貞

宮人金氏有寵號邀石宅宮人慶州人融大
詐稱新羅元聖王遠孫認良民五百餘口爲
奴婢以贈金氏及平章韓蘭卿侍郎金諾爲

援御史臺按問得實奏請罪之穆宗命罰金
氏銅一百斤流蘭卿諾于外闕者皆賀

顯宗元貞王后金氏成宗之女顯宗即位納
爲后稱玄德王后元年王避契丹兵南幸后
從行九年四月薨謚元貞葬和陵十八年加
懿惠

元和王后崔氏亦成宗之女生孝靜公主天
壽殿主初稱恒春殿王妃後改常春殿亦從
王南幸八年十二月贈后外祖崔行言尚書

左僕射外祖母金氏豐山郡大夫人母崔氏
樂浪郡大夫人薨諡元和王后

元城太后金氏安山人侍中殷傅之女生德
宗靖宗仁平王后景肅公主初顯宗南幸及
賊退還至公州殷傅時爲節度使使后製御
衣以進因納之稱延慶院主九年七月生靖
宗改院號爲宮遣使賜禮物十三年九月追
贈殷傅爲推忠守節昌國功臣開府儀同三
司守司空上柱國安山郡開國侯食邑一千

戶妣安山郡大夫人尋册后爲王妃十五年
又贈祖肯弼爲尚書右僕射上柱國安山縣
開國侯食邑一千五百戶祖妣安山郡大夫
人外祖李許謙尚書左僕射上柱國邵城縣
開國侯食邑一千五百戶十八年九月賜后
舊宅號爲長慶宮十九年七月薨諡元成王
后葬明陵祔顯宗廟德宗即位追尊爲王太
后後加容懿恭惠文宗十年十月加英穆後
又加良德信節順聖仁宗十八年四月加慈

聖高宗四十年十月加廣宣

元惠太后金氏亦殷傅之女生文宗平壤公
基孝思王后初稱安福宮主顯宗十一年五
月改安福爲延德十三年六月卒謚元惠葬
懷陵十六年四月追贈王妃十八年五月加
謚平敬王后文宗時尊爲太后

元容王后柳氏宗室敬章太子之女顯宗四
年五月納爲妃薨謚元容王后

元穆王后徐氏利川人內史令訥之女顯宗

十三年八月納爲淑妃稱興盛宮主十七年
三月追贈母崔氏爲利川郡大夫人繼母鄭
氏利川郡大君文宗十一年五月卒有司奏
禮庶母有子者總麻三月興盛宮主無子上
不宜服制可輟朝三日又制興盛宮主火殯
訖令有司瘞骨置陵定侍衛貧吏及守陵戶
歲時奉祀中書省奏伏審乙未十二月判旨
景興院主貴妃依文和大妃例葬除其陵號
興盛景興皆是聖考妃追孝之禮不宜有異

况興盛無後上既無服請除陵號及歲時奉祀制從之贈謚元穆五后

元平五后金氏亦殷傅之女生孝敬公主顯宗十九年十月贈元平五后陵號曰宣

元順淑妃金氏史失其鄉平章事因渭之女生敬成王后初稱景興院主顯宗十五年正

月冊為德妃九月授因渭尚書左僕射叅知政事柱國京兆縣開國男食邑三百戶仍令

致仕

別州

元質貴妃王氏清州人中書令可道之女

貴妃庾氏史失世系初為宮人顯宗十六年

封貴妃宮人韓氏名萱英揚州人平章事蘭

卿之女生檢校太師忠宮人李氏給事中彥

述之女宮人朴氏全州人內給事同正溫其

之女生一女阿志

德宗敬成王后金氏顯宗之女德宗三年二

月納為王后宣宗三年七月薨謚敬成葬質

陵肅宗元年六月祔德宗廟仁宗十八年四

高麗史卷八十八

月加柔貞高宗四十年十月加寬肅

敬穆賢妃王氏中書令可道之女德宗即位
納為妃尋冊為賢妃生殤懷公主卒謚敬穆
孝思王后金氏顯宗之女

李氏扶餘郡人工部侍郎稟焉之女劉氏忠
州人檢校少監寵居之女史皆失其稱號

靖宗容信王后韓氏湍州人贈門下侍中祚
之女靖宗初為平壤君納以為妃及即位號
延興宮主元年后生子賜名訶冊為惠妃後

封定信王妃二年七月薨八月葬玄陵文宗
二年三月追謚容信王后十年十月加定懿
仁宗十八年四月加明達高宗四十年十月
加禧穆

容懿王后韓氏亦祚之女靖宗四年四月冊
為麗妃號昌盛宮主後改玄德宮六年二月
冊為王后生哀殤君昉樂浪侯璫開城侯暉
容穆王后李氏扶餘郡人工部侍郎稟焉之
女號昌盛宮生悼哀公主

容節德妃金氏慶州人門下侍中元冲之女
號延興宮主肅宗七年三月卒王降弔慰教
書追封德妃謚容節

延昌宮主盧氏未詳世系初靖宗聞其美潛
納宮中遂專房宴文宗立以遣命賜盧氏延
昌宮門下省及御史臺駁奏盧氏納不以禮
且先王亂命不可從也王終不允二年三月
卒

文宗仁平王后金氏顯宗之女

仁睿順德太后李氏仁州人中書令子淵之
長女號延德宮主文宗六年二月封爲王妃
冊曰王化興邦首述關雎之義坤元立配固
推神馬之占蓋所以敦序二儀甄揚四德彪
簡編而可久東賢淑以爲先蓋據前修用旌
殊寵咨爾延德宮主李氏含章有順飾性無
虧覆以玉衣早膺嘉瑞貯之金屋亮協幽求
爰將五可之稱來演六宮之慶萬覃之詠案
著於睦和蘭夢之徵誕彰於蕃衍執組紉之

妙致景慕共姜守閨壺之令猷思齊大妣顧
惟弘懿宜示正封遂頒命於鷗銜俾加榮於
翟服令遣使某官某持節備禮冊爲王妃於
戲后妃之職國家所宗勵乃柔規效餘芳於
翼翼竟令彤史免專矣於熙殷永孚于休母
忘厥訓以父子淵爲太尉母樂浪郡君金氏
爲大夫人后生順宗宣宗肅宗大覺國師煦
常安公琇普應僧統規金官侯杰卞韓侯愔
樂浪侯忱聰慧首座璟積慶保寧二宮主宣

宗三年二月冊封爲太后諸道皆表賀州縣
並獻布無慮十萬餘匹七羅亦來賀獻方物
九年九月薨于西京歸葬戴陵后性好佛創
國清寺又願銀書瑜伽顯揚論至肅宗乃成
仁宗十八年四月加謚聖善高宗四十年十
月加孝穆
仁敬賢妃李氏亦子淵之女號壽寧宮主文
宗三十六年正月封淑妃生朝鮮公燾扶餘
公遜辰韓公愉卒謚仁敬

仁節賢妃李氏亦子淵之女號崇敬宮主文
宗三十六年七月卒謚仁節

仁穆德妃金氏侍中元冲之女號崇化宮主
宣宗十一年六月卒謚仁穆

順宗貞懿王后王氏宗室平壤公基之女

宣禧王后金氏慶州人大卿良儉之女順宗
在東宮選入宮有寵然文宗惡之勅還外第
故終無子號延福宮主仁宗四年二月卒追
謚宣禧王后八年四月命有司禘于大廟祔

順宗廟仁宗十八年四月加謚恭懿高宗四
十年十月加和順

長慶宮主李氏仁州人戶部郎中顥之女順
宗即位納以爲妃王薨在外宮與宮奴通事
覺廢

宣宗貞信賢妃李氏仁州人平章事預之女
宣宗爲國原公納以爲妃生敬和王后而卒
謚貞信

思肅太后李氏仁州人工部尚書碩之女號

延和宮妃初宣宗為國原公納之生獻宗及
遂安宅主宣宗即位冊為王妃獻宗嗣位尊
為太后殿號中和置府曰永寧王幼弱不能
聽決機務太后稱制凡軍國大小事咸取決
焉獻宗薨有司奏罷永寧府及中和殿號薨
謚思肅太后睿宗二年四月王欲以貞信賢
妃祔宣宗諫官奏曰貞信為國原公妃年月
不久思肅自嬪公府以至踐祚內助居多及
太子繼統臨朝稱制者三年獻宗遜位于肅

宗乃退居舊宮終無失德宜以思肅升祔制
曰嫡庶之分不可不別更詳禮典以聞諫官
復奏曰春秋之義國君即位未踰年者不合
列序昭穆國君尚如此况后妃乎請以思肅
升祔王從之仁宗十八年四月加謚貞和高
宗四十年十月加匡肅

元信宮主李氏仁州人平章事頰之女號元
禧宮妃生漢山侯昫獻宗立妃兄中樞使資
義欲奉昫為王事覺誅肅宗即位流宮主及

延和宮妃初宣宗爲國原公納之生獻宗及
遂安宅主宣宗即位冊爲王妃獻宗嗣位尊
爲太后殿號中和置府曰永寧王幼弱不能
聽決機務太后稱制凡軍國大小事咸取決
焉獻宗薨有司奏罷永寧府及中和殿號薨
謚思肅太后睿宗二年四月王欲以貞信賢
妃祔宣宗諫官奏曰貞信爲國原公妃年月
不以思肅自嬪公府以至踐祚內助居多及
太子繼統臨朝稱制者三年獻宗遜位于肅

宗乃退居舊宮終無失德宜以思肅升祔制
曰嫡庶之分不可不別更詳禮典以聞諫官
復奏曰春秋之義國君即位未踰年者不合
列序昭穆國君尚如此况后妃乎請以思肅
升祔王從之仁宗十八年四月加謚貞和高
宗四十年十月加匡肅

元信宮主李氏仁州人平章事頴之女號元
禧宮妃生漢山侯昫獻宗立妃兄中樞使資
義欲奉昫爲王事覺誅肅宗即位流宮主及

昀于慶源郡

肅宗明懿太后柳氏貞州人門下侍中洪之女號明福宮主後改號延德宮主肅宗二年宮主生子王遣使下教賜銀器匹段布穀鞍馬四年三月封為王妃冊曰殷聘有幸而作配周徵太任以為妃而皆致王業之勃興載史編而彪煥合遵舊制特舉寵章咨爾延德宮主李氏霽月儲精曾沙協慶結禱外郎行婦道以有聞鳴珮中闈贊皇猷而匪懈旋被

神明之福祐得諧胤嗣之蕃昌今遣某官某持節備禮冊命為王妃於戲絲綸降命俾正位於璇宮綸翟加儀永流芳於彤管教訓斯在敬慎勿忘后生睿宗及上黨侯必圓明國師澄儼帶方公備大原公倬齊安公僭通義侯僑大寧興壽安壽福寧四宮主睿宗即位尊為王太后殿曰天和府曰崇明生辰曰至元節三年正月冊曰臣聞冊后之制歷代相因稱皇太者秦漢之通規以子貴者春秋之

高麗史卷八十一 二十二
格語凡爲後胤合効前修伏惟我聖母德備
母儀位居坤極神資淑祐蚤儲沙麓之祥性
蘊貞明獨稟塗山之訓遂令大業永保中興
臣叨膺顧命嗣守宗祧自承鞠育之恩誓奉
慈嚴之教雖日以萬錢之養未能盡於孝誠
而尊加三字之封庶永光於信牒虔尋舊典
率籲群情爰撰吉辰用上尊號臣不勝大願
謹遣某官某奉玉冊金寶上尊號曰王太后
伏願遵前古之憲章順上天之眷佑俯迴睿

母
母

鑑誕受嘉稱七年七月病革王馳詣請入大
內行至信朴寺薨王率百官上謚明懿王太
后冊曰禮以飭終爲子之達孝謚以旌德歷
代之成規合舉舊章用申哀懇伏惟大行王
太后柔嘉賦性恭儉律身自先王之在藩作
好仇而宜室輔佐志存於卷耳肅和德茂於
穠華於文祖有逮事之勤於戴陵有思齊之
敬屬君臨於大寶整后服於六珈吉協黃裳
美流彤管顧惟冲昧仰荷劬勞洎襲丕圖動

飭
飭

肺
昧

高麗史卷八十一
三
煩慈訓罄海宇奉長樂之養以寶冊稱太上
之尊八載母臨萬姓孩慕今聞動於中夏異
恩浹於東朝何其不慙之深惟此乃殂之酷
攀號莫及創鉅奚勝今有禮官恭稽謚法獨
見先識曰明溫和聖善曰懿以彰莫大之德
蓋永無窮之傳謹奉冊上尊謚曰明懿主太
后伏惟誕膺典冊幽贊邦家八月葬崇陵八
年遼遣使致祭其文曰惟靈溫惠毓德柔嘉
成儀以母道教于一方以親恩睦于九族至

蘭香氣本自芬芳桃李有華加之賡實先臣
謝世長嫡承家棘風方亟於吹噓薤露遽悲
於零落人生至此天道難知朕方撫存侯藩
知恤臣意彼死生雖以數至于母子其如哀
何爰遣介輶往陳奠禮魂兮不昧歆我殊私
百官奏曰本朝自祖宗以來太后升遐隣國
未嘗遣使弔祭今始見是禮又前夕雨雪暴
作及車駕行禮日色清明人心喜悅宜令百
僚朝賀王從之仁宗十八年四月加謚柔嘉

高宗四十年十月加光惠

睿宗敬和王后李氏宣宗之女長於外家封
延和公主睿宗納爲妃容儀淑麗甚有寵年
三十一薨葬慈陵謚敬和王后

文敬太后李氏朝鮮國公資謙第二女還入
宮號延德宮主睿宗四年生元子於私第是
爲仁宗王遣使下詔曰汝肅穆以著儀柔順
以迪性有覩天之德主於內朝應彌月之期
誕我元子固祖宗之基構得臣庶之歡欣宜

示寵嘉以彰眷遇仍賜銀器綾羅錦絹鞍馬
布米妃上表謝九年冊爲王妃冊曰在天成
家尚有軒星之躔理國齊家必崇坤極之位
上以承宗廟下以厚人倫永惟興替之本靡
不由此焉夏之興也以塗山殷之興也以莘
野朕若稽於典憲祈協于神民咨爾延德宮
主李氏性惠而明儀靜而肅惟乃烈祖克勤
王家累爲姻親積有善慶篤生聖后世繼括
王覃及後昆產茲懿媛粵朕登位來嬪于京

關雎之化行膠木之恩逮常有進賢之志固無私謁之心以至協熊夢之祥誕生家嗣中鷄鳴之戒密輔朕躬宜加顯號以表中闈今遣某官某持節備禮冊命爾爲王妃夫惟先王釐厥士女始自內理御于邦家於戲予思大賚之人褒升令德爾以相成之道益礪芳猷同濟宏休永綏遐福后生仁宗承德興慶二宮主十三年薨后性柔嘉聰慧有寵於王自寢疾王親調藥餌及薨屢舉哭臨謚順德

王后葬綏陵王親祖送于神鳳門外後又幸魂堂諫官上疏曰前日初喪悲哀過度及葬祖祭親拜獻爵臣民瞻望竊謂過禮今又守小信屈至尊以臨靈帳恐傷大體王曰祖庭之事非自朕起嘗聞宋帝祖送靖和皇后出端門外親酌拜奠故倣而爲之况一幸魂堂何害於義仁宗即位追尊爲文敬王太后十八年四月加謚慈靖

文貞王后宗室辰韓侯愉之女選入宮王薨

出居永貞宮仁宗七年封貴妃十六年薨王
避正殿素服三日百官亦素服三日謚文貞
王后

淑妃崔氏叅政湧之女選入宮號長信宮主
仁宗七年封淑妃二十二年贈其父湧守司
空尚書右僕射叅知政事明宗十四年卒

仁宗廢妃李氏朝鮮國公資謙第三女資謙
恐他姓爲妃權寵有所分強請納之仁宗不
得已納之冊爲延德宮主資謙敗諫官累疏

別

言宮主於上爲從母不可以配極王乃出之
雖以資謙故出恩賚優渥十七年卒

廢妃李氏資謙第四女資謙圖不軌置毒餅
中以進妃密白王以餅投烏烏斃又送毒藥
令妃進于王妃捧椀陽蹶而覆之資謙敗亦
以諫官言廢王念覆椀之功賜田宅奴婢恩
眷甚厚毅明二王亦事之謹明宗二十五年
卒葬以后禮

恭睿太后任氏中書令元厚之女門下侍中

李瑋之外孫妃誕夕瑋夢有黃大旗豎於其
第中門旗尾懸繫於宣慶殿鴟尾妃生瑋奇
愛之曰此女後當遊宣慶殿及笄平章事金
仁揆子之孝聘之婚夕之孝至門妃暴疾幾
死乃謝遣卜人占病曰勿憂此女貴不可言
必爲國母時李資謙已納兩女子于王聞其言
惡之即奏貶元厚爲開城府使歲餘府倅夢
太守廳事椽棟圻作大竇黃龍從竇而出詰
朝倅具朝服詣元厚具陳其夢以賀曰使君

家必有異慶公其識之仁宗嘗夢得荏子五
升黃葵三升以語拓俊京俊京對曰荏者任
也納任姓后妃之兆也其數五者誕五子之
瑞也黃者皇也與皇王之皇同葵者揆也與
道揆之揆同所謂黃葵者皇王執道揆御邦
家之瑞也其數三者五子之中三子御國之
兆也王旣出資謙二女四年選入宮號延德
宮主五年生毅宗王遣使下詔曰汝任氏起
自德門入司陰教受儆戒相成之道無險陂

私謁之心得純震之長男協斯干之吉夢爰
勅邇臣式將好賜賜銀器彩段布穀鞍馬七
年冊爲王妃詔曰古先哲王之有天下也非
獨由已德之茂蓋亦有內助之賢朕叨承景
命嗣守丕基王假有家重人倫之大義天作
之合宜君子之好俶咨爾任氏夙以婦才起
於德閭動必由於禮節居不忘於女功自初
作嬪爰得有子豈特室家之好實增邦國之
休是用舉以典章加之位號今遣某官某持

已巳力
聖恩考

節冊命爲王妃於戲儉約可以保厥身肅恭
可以共其職當體朕意求孚于休八年生大
寧侯暉王又遣使下詔曰汝以覩天之資居
儷極之貴樂關睢之窈窕服卷耳之勤勞乃
符帶韜之祥載見弄璋之慶歎嘉無已恩禮
當優仍賜禮物九年生明宗王又遣使下詔
曰茲爾任氏典予內職正位中宮震索得男
既主其器螽斯多子亦由爾賢謂茲羆熊之
祥協彼燕媒之后宜膺寵數永保洪休十六

年妃母李氏卒王素服避正殿百官表慰素衣三日贈李氏辰韓國大夫人后生毅宗及大寧侯璟明宗元敬國師冲曦神宗承慶德寧昌樂永和四宮主毅宗即位尊爲王太后殿曰厚德立府曰善慶置官屬初后愛次子欲立爲太子以故王怨之一日侍坐語侵后跣下殿仰天而誓忽雷雨大震電光入座王驚懼俛入太后衣下俄而震殿柱王悔悟遂爲母子如初明宗十二年冲曦死王恐后悲

痛不自居數月后聞之意諸將害之憤恚得氣攻鬪病時神宗封平諒公亦患痔久不入覲后疑神宗與曦同禍王命腰輿入謁后且喜且泣曰吾以爲死不意復見爾面平諒公曰母后之疾勞心致然請張樂悅解於是奏管絃王與平諒公上壽爲樂氣少下未幾復篤薨壽七十五葬純陵上謚恭睿太后明年金遣使來祭其文曰惟靈早自慶闕來嬪侯藩始以婦道相其夫終以母慈保厥子遽違

榮養良可哀憐宜加賻贈之恩仍致酒殽之
奠貞魂如在寵數其歆

宣平王后金氏兵部尚書璿之女仁宗五年
納爲次妃毅宗尊爲王太妃延壽宮主明宗
九年卒謚宣平王后

毅宗莊敬王后金氏宗室江陵公溫之女毅
宗爲太子時納爲妃仁宗遣使下詔仍賜禮
物毅宗即位封爲興德宮主生孝靈太子祈
敬德安貞和順三宮主高宗四十年十月加

謚惠資

莊宣王后崔氏叅知政事端之女

明宗光靖太后金氏江陵公溫之女封義靜
王后生康宗延禧壽安二宮主薨康宗立追
冊爲光靖太后冊曰貴以子春秋之成式謚
知行戴禮之格言欲伸永慕之懷須舉追尊
之典恭惟我聖母姿凝偃月慶洽玄雲妙齡
作配於先皇婦道正儀於中饋謂當眉壽以
長生坐膺至理乃乘莽渺而奄棄已積流年

高麗史卷八十八 三十一
而臣今居莫大之崇高實本難名之鞠育雖
殫九州之富而無以致養唯極天下之美而
庶幾薦名謹遣某官某奉玉冊追尊爲太后
謚曰光靖俯納丕稱曲垂陰援高宗四十年
十月加謚恭平

神宗宣靖太后金氏江陵公溫之女神宗爲
平諒公納之及即位立爲元妃三年封爲宮
主冊曰朕聞自古有國有家立政立事非獨
咨謀於外輔亦先求助於中閨咨爾金氏星

嫠分精銀潢聯派貞明之性本自天成柔靜
之儀不煩姆訓動而中節於環佩居則專精
於組紃繫朕躬之在藩以淑質而作配早協
坤貞之吉不顯其光果符震長之尊則篤其
慶豈獨室家之正始實惟社稷之延休共潛
光於二十年聿修婦道今踐祚於九五位盡
贊皇猷今遣使某官某持節冊命爲宮主於
戲能以儉約率其身克紹關雎之化亦以法
度供其職遠頒彤管之風祗服訓辭永膺天

祿后生熙宗及襄陽公恕孝懷公主敬寧宮
主熙宗立尊爲王太后府號慶興殿號長秋
俄改府號爲膺慶殿號爲綏福后自幼勤女
功當忠獻廢立之際備嘗艱難謹慎自守高
宗九年薨王哀悼命有司以禮葬于真陵上
謚宣靖太后高宗四十年十月加信獻

熙宗成平王后任氏宗室寧仁侯禎之女諱
稱任氏熙宗七年封爲成平宮主冊曰朕聞
易贊坤元所以配乾剛之道詩稱后德所以

明王化之基故塗山適而夏業興大任歸而
周室盛蓋賴內助之美以臻外理之功布在
前書貽爲後範朕祗承景命續守宏旨理國
先家所重人倫之本自天作合豈無君子之
述咨爾元妃任氏夔宿分輝天潢毓粹夙著
肅雍之德而無險詖之心朕初在藩乃爲嘉
耦比登大寶益贊洪猷允協斯干之吉夢長
發其祥果符純震之得男克昌厥後豈特室
家之慶實惟邦國之光既婦德之若斯宜恩

章之特厚肆頒爵號俾正宮庭今遣某官某
持節備禮冊命爾爲王妃咸平宮主於戲躬
勤儉以保身循法度以供祀宜思厥服罔或
不祗后生昌原公社始寧侯禕慶原公祚大
禪師鏡智冲明國師覺膺安惠太后永昌德
昌嘉順貞禧四宮主高宗三十四年薨葬紹
陵上謚咸平王后冊曰功崇則禮優德盛則
謚重爰稽古典式薦鴻休伏惟大行王后宗
室之英王姬之女聖皇知其有相留養後宮

上皇納以爲妃俾專中壺篤生邦媛升配朕
躬夢幻倏然縱有千秋之痛子孫多矣已符
萬葉之傳凡此嬪功職由母訓何上壽未滿
卽大期奄臻冥冥難可憑漠漠不可問但於
疇昔歷諸險難恐積心勞因以疾化徒洒無
從之泣追揚不朽之芬謹遣某官某奉冊上
謚曰咸平王后惟冀上靈俯膺嘉冊四十年
十月加貞章

康宗思平王后李氏義方之女康宗爲太子

義方納之生壽寧宮主義方誅見黜
元德太后柳氏宗室信安侯城之女生高宗
康宗元年冊爲延德宮主詔曰爲君克艱理
內尤劇大舜之化天下也蓋賴娥皇之釐降
王季之肇邦基也亦因摯仲之思齊顧予天
匹之賢明有古后妃之輔弼盍加顯冊以答
潛功今遣某官某持節備禮冊命爾爲王妃
延德宮主兼賜印綬衣櫛金銀器匹段布穀
奴婢鞍馬冊曰后妃之德王化所基周文迎

禮樹

渭水以立嬪本支益茂夏禹娶塗山而作匹
曆數遐昌宜用前規特舉彝典咨爾王妃柳
氏天生淑質玉潤奇姿內無險陂之心外有
柔嘉之行感赤龍之入寢誕得元良翫黃鳥
之集林廣施仁惠顧陰功之既著合徽號之
優加茲擇蕙時載頒竹冊今遣某官某持節
備禮冊命爾爲王妃延德宮主於戲能循厥
度淑慎其身高宗二十六年薨葬坤陵上謚
元德太后四十年十月加貞康

友
友

高宗安惠太后柳氏熙宗之女熙宗七年冊
爲承福宮主高宗五年納爲妃生元宗安慶
公溍壽興宮主十九年薨百官玄冠素服三
日上謚安惠元宗元年追尊爲王太后忠宣
王二年元武宗降制曰崇德報功法舉追榮
之典分邦列爵恩頒及內之章酬我舊勲同
茲顯號高麗國王王璋曾祖母柳氏傳芳令
族作配高門屬皇祚之興隆偕名藩而臣附
明賢所化貞信無頗傳子至孫極富與貴三

韓保國位同異姓之侯王五等疏封名亞寡
君之宗室聿新殊渥庸慰淑靈可追封高麗
王妃

元宗順敬太后金氏慶州人莊翼公若先之
女封爲敬穆賢妃高宗二十二年元宗爲太
子納爲妃生忠烈王而薨元宗三年追封爲
靜順王后忠烈王即位追尊順敬太后忠宣
王二年元武宗降制曰昭令德于前人爵以
隆于三世受介福于王母恩特侈于再傳高

麗國王王璋祖母金氏淑慎其儀柔嘉維則
東藩作儷北闕聯姻不墜簪圭功有武公之
父子親承盥饋禮如王氏之舅姑一則彰夙
夜之勤一則示閨門之肅嗣爲貴壻况有賢
孫諄襲請䟽之來聞赫奕微彝之並舉鳳綈
鸞檢翟茀魚軒於戲重莫重於傳家有懿舍
飴之訓榮莫榮乎錫號往歆加祿之章可追
封高麗王妃

慶昌宮主柳氏宗室新安公佺之女號慶昌

宮主元宗元年冊爲王后生始陽侯珪順安
公悰慶安咸寧二宮主王欲封忠烈爲太子
后譖於王曰太孫間殿下東還稍無喜色且
儲副繼體者也豈可立權臣之甥乎王頗信
之金俊力諫疑乃釋忠烈王三年誣坐呪詛
廢爲庶人

列傳卷第一

四

列傳卷第二

高麗史八十九

正憲大夫工曹判書集賢殿提學知 經筵春秋館事兼成均大司成臣鄭麟趾奉
教修

后妃二

二女下十

忠烈王齊國大長公主名忽都魯揭里迷失
元世祖皇帝之女母曰阿速真可敦元宗十
五年忠烈以世子在元尚公主元宗薨王嗣
位東還遣樞密院副使奇蘊逆公主于元王
幸西北面迎之又令妃嬪諸宮主及宰樞夫

分行

人出迎宰樞百官迎于國清寺門前王與公主同輦入京父老相慶曰不圖百年鋒鏑之餘復見大平之期時帝令脫忽送公主脫忽先至張穹廬掖以白羊膏明年正月冊爲元成公主百官皆賀宮曰敬成殿曰元成府曰膺善置官屬以安東京山府爲湯沐邑九月生元子于離宮是爲忠宣王諸王百官皆賀公主從者在門凡入者悉褫其衣謂之設比兒貞和宮主宴賀生男宮人小尼者布席于

褫
褫

東廂王曰不如正寢小尼不告公主就正寢置平牀爲公主坐式篤兒曰平床之坐欲使同於宮主也公主大怒遽令移席西廂蓋以西廂舊有高榻也及宮主行酒王顧見公主公主曰何白眼視我耶豈以宮主跪於我乎遂命罷宴下殿大哭曰將往吾兒處遂促輦式篤兒將進輦王杖走之公主乳母曰主若出老婢必死于此手搯其吭視將自絕公主乃止時王遣式篤兒如元請朝式篤兒將行

謂大將軍印公秀曰公主使我奏宮主事若
奏之必不利於國如何則可公秀曰伉儷之
閒妬媚之言何足上聞君既奏之脫公主後
悔將何及已式篤兒然之二年公主以安平
公女許嫁忻都子王欲不許公主邀慶昌宮
主及安平公妃今與忻都妻面約婚宮主安
平公之姨也有吐蕃僧自元來自言帝師遣
我爲公主國王祈福宰樞備旗蓋出迎閭巷
皆焚香其僧食肉飲酒常言我法不忌酒肉

唯不邇女色無何潛宿倡家又請設曼陀羅
道場令備金帛鞍馬雞羊以粝爲人長三尺
置壇中又以粝作小兒及燈塔各百八列置
其傍吹螺擊鼓凡四日僧戴花冠手執一箭
繫皂布其端周回踴躍車載粝人令旗者二
甲者四弓矢者三十曳弃城門外公主施錢
甚厚其徒爭之訐曰僧非帝師所遣其佛事
亦僞也公主詰之皆伏遂黜金郊外公主取
興王寺黃金塔入內其裝嚴多爲忽刺歹三

謂大將軍印公秀曰公主使我奏宮主事若
奏之必不利於國如何則可公秀曰伉儷之
閒妬媚之言何足上聞君既奏之脫公主後
悔將何及已式篤兒然之二年公主以安平
公女許嫁忻都子王欲不許公主邀慶昌宮
主及安平公妃今與忻都妻面約婚宮主安
平公之姨也有吐蕃僧自元來自言帝師遣
我爲公主國王祈福宰樞備旗蓋出迎閣巷
皆焚香其僧食肉飲酒常言我法不忌酒肉

唯不邇女色無何潛宿倡家又請設曼陀羅
道場令備金帛鞍馬雞羊以牦爲人長三尺
置壇中又以牦作小兒及燈塔各百八列置
其傍吹螺擊鼓凡四日僧戴花冠手執一箭
繫皂布其端周回踴躍車載牦人令旗者二
甲者四弓矢者三十曳弃城門外公主施錢
甚厚其後爭之訐曰僧非帝師所遣其佛事
亦僞也公主詰之皆伏遂黜金郊外公主取
興王寺黃金塔入內其裝嚴多爲忽刺歹三

哥等所竊公主將毀用之王禁之不得但涕
泣而已後王與公主如興王寺僧乞還金塔
公主不許又令忽刺歹括大府寺銀入內郎
將王涓宗室疏屬也廣平公諱奪其奴婢涓
壻密直金佻訟而得之後征倭溺死諱獻其
奴婢于公主公主召老奴問其奴婢與諱奴
婢連婚接派者幾三百人公主并取之諱扣
頭宮門請還之不許有一尼獻白苧布細如
蟬翼雜以花紋公主以示市商皆云前所未

觀也問尼何從得此對曰吾有一婢能織之
公主曰以婢遺我如何尼愕然不得已納焉
公主嘗以松子人參送江南獲厚利後分遣
宦官求之雖不產之地無不徵納民甚苦之
三年以將入朝預設燃燈公主先出閱樂於
彩棚前王將如奉恩寺宰樞不及王怒囚僉
議府吏既而今右承旨薛公儉語宰樞曰公
主請我夙駕而卿等後至恐公主責我且囚
府吏卿等毋以我爲躁也是年夏以公主生

高麗史卷八十九
女設滿月宴俄而母訃音至以才免身祕之
後五日乃告公主痛哭食肉如舊翼日達魯
花赤設收淚宴王疾革宰樞請公主停營繕
縱鷹鷄又請曰凡可以禴禳者無不盡心唯
興王寺金塔在宮中願還之公主皆許之王
聞之大喜令承旨李尊庇還其塔于興王寺
王將移御天孝寺王先至山下公主繼至以
陪從少怒而還王不得已亦還公主以杖迎
擊之王投帽其前遂忽刺之罵曰此皆汝曹

所爲予必罪汝公主怒稍弛至天孝寺又以
王不待而先入且詬且擊欲上馬往竹坂宮
文昌裕謂薛公儉曰辱豈有大於此者乎公
主嘗請工匠于元至是木匠提領盧仁秀使
三哥告公主曰宮室之役旣罷盍歸我乎公
主大怒詰宰樞曰我只罷役徒奈何亦遣工
匠乎宰樞曰罷役是日官之言臣等何知公
王益怒曰豈蔑視我耶必懲一宰樞以警其
餘宰樞難其對李摺曰向者臣等以王疾篤

請罷役修省幸而見聽工匠妄謂役罷辭去耳今召而復作亦未晚也公主意解既而日官又回請勿構三層閣不聽發諸道役夫督之愈急四年公主生男群臣宴賀夏王及公主如元嘉林縣人告達魯花赤曰縣之村落分屬元成殿及貞和院將軍房忽赤巡軍唯金所一村在今鷹坊迷刺里又奪而有之我等何以獨供賦役達魯花赤曰非獨汝縣若此者多矣將使巡審諸道以蠲其弊請王遣

人偕往宰樞李之氏白王曰達魯花赤使人巡審諸道得其實以報朝廷非細事也乞收王旨與官旨籍民歸本役王從之公主不肯乃止王及公主到京師謁帝帝宴慰之王率群臣入自東南隅立庭中公主張小紅傘率永寧公王總管夫人及諸姬媵入自東北隅獻金銀器皿細苧布拜訖由東西上殿永寧公及從臣元傳李汾禧朴恒宋玠康允紹從之玠以下坐東偏軍僚皆與焉公主以世

子及小王女謁皇后獻銀十錠細苧布二十匹后見世子愛之賜酒卮刀子公主又抱世子見于太子妃妃名之曰益智禮普化皇后賜公主彩段一車及東還公主請王欲令入京日兩殿牽龍著金花帽宰樞文武百官以禮服迎謁王遣李摺傳旨印公秀以謂不可請用時服從之只令牽龍巡檢白甲指諭都將校樂官禮服迎駕王與公主入京百官致仕宰樞及三品諸宮院副使_班迎于郊及宣

宮
官

義門王與公主同輦國學七管諸徒東西學堂諸生進歌謠五年王在元公主出內府樂器命伶官奏樂竟日鷹坊忽赤三番連日設宴又結層棚于宮中燃于燈且令伶人奏樂達曙又禿哥押生虎至公主登園亭觀之六年帝流皇子愛牙赤于大青島公主迎于城外遂張樂宴于館從者止之曰皇子以帝命之貶所豈可耽樂遂罷九月以世子生辰置宴新殿時東征事急除女樂雜戲但奏漢樂

群臣各以贄見世子奉觴舞王與公主歡甚
序元使也速達于僉議宰相下崔仁著于上
將軍下也速達謂盧英曰吾與崔知事一也
何今坐下也公主聞之曰仁著蒙漢耶高麗
耶坐上將軍之下足矣也速達慙七年皇后
訃音至公主將奔喪科歛銀帑布又選良家
處女以行至懿州帝勅還國乃還八年王與
公主畋于忠清道渡臨津公主怒責王曰遊
畋非急務何爲引我至此王無以對次安南

責尹秀曰此地無鵝鵝何誘王遠來又謂王
曰惟遊田是務奈國事何王慚憤露坐於外
王火獵民有焚禾者償其直公主謂趙仁規
曰民之病已不可言扈從者亦勞矣盍歸乎
遂還十一年王以內僚上將軍金子廷爲東
京副使公主謂王曰子聞東京是王之母鄉
然乎王曰然公主曰家奴爲邑宰可乎南班
人得居中外重任始自何代王曰自元廟始
公主曰王真元王之子也王有慚色王留意

音律嘗使內豎與伶人鼓樂公主遣人告王曰以絲竹而理國家非所聞也遂罷之十三年公主將入覲命選良家子女使忽赤搜索人家雖無女者亦驚擾怨泣聲徧閭巷遂選西原侯瑛大將軍金之瑞侍郎郭蕃別將李德守女又遣中郎鄭允耆于江華搜奪民家所藏白金五十斤乃與世子如元次溫泉世子有不豫色忽刺歹問其故曰吾將娉西原侯女今在選中以故不悅忽刺歹以告公主

即遣其女公主至西京聞賊起咸平府道梗遂還有告中郎將金仲卿以美女獻王者公主遂囚仲卿巡馬所初世祖以亡宋醫鍊德新賜王德新能合助陽丸得幸於王及公主伍允孚嘗痛憤以爲此藥不宜胎產使三韓支胤不蕃者必此人也公主連歲有身及王得德新藥更不妊娠十七年元將薛閣于平哈丹謁公主獻所俘男女五十良馬五匹王與公主置宴慰之公主坐當中那蠻歹坐其

高麗史卷八十九
右王坐其左都歡大王阿石駙馬河西國王
重慶郡王薛閣干閣梨帖木兒塔出等皆以
次坐翼日亦如之十九年王與公主如元次
金郊王怒供億稽緩杖西海按廉使庾瑞至
鳳州瑞享王溫言慰之公主曰前日金郊則
受譴今日鳳陽則取悅兩進膳羞盡是民膏
還駕時勿以斂民取悅爲事二十年世祖崩
成宗即位冊公主曰朕嗣有令緒時庸展親
睠先朝帝女之賢視今日宗藩之貴肆揚煥

號用率彞章釐降高麗國王公主忽都魯揭
里迷失毓秀天潢承徽宸極孝恭有則早閑
壺範之慈警戒無違特借公宮之重正嬪儀
於貳館敦王化於三韓車服不係其夫義方
以教其子既優旣渥是惟茅土之分來歸來
寧與覩邦國之慶因廷臣之建議即邑國以
䟽封于以錫丹闈紫禁之恩于以彰赤罰駟
車之寵於戲周王姬爲婦道之準以成其肅
雍唐漢陽以皇姑之尊深戒乎驕侈罔俾前

代得專令名可封安平公主二十二年王與
公主如元明年晉王將之國帝幸其邸餞之
王與公主侍宴酒酣公主歌王起舞是年五
月還國時壽寧宮芍藥盛開公主命折一枝
把玩良久感泣尋得疾薨于賢聖寺壽三十
九遣副知密直元卿如元告喪元遣火魯忽
孫來弔喪皇太后賜賻又轉藏經追福公主
嘗入朝親命畫工寫真至是來自元安于仁
和殿九月葬高陵謚莊穆仁明王后二十四

年晉王遣使致祭高唐王亦遣使歸賻是年
忠宣王受禪追尊爲仁明太后二年武宗降
制曰三韓爲國五季已王雖居東海之濱實
享南面之奉由其先有功於太祖許帝室以
連姻故季女鍾愛於世皇即公宮而命黜方
穠青軒之桃李俄晞白露於蕪葭永懷懿親
用隆恤典高麗王璋妣皇姑安平公主高麗
王妃發祥坤掖分派天潢以舜妃癸比之宵
明爲古公亶父之姜女善於媿德車服不矜

其夫家樂有娠賢茅土已續其父服可謂全
妻道之終始苟不因湯沐之安平原進大封
曷彰尊屬於戲自他邦而北闕最道路之五
千移近甸於東秦盡山河之十二明靈可作
殊報是承可追封皇姑齊國大長公主高麗
國王妃

貞信府主宗室始安公綱之女忠烈即位冊
為貞和宮主二年有人投匿名書于達魯花
赤石抹天衢館又呼於道曰有衣則衣有食

秦
秦

則食勿為他人所得明日達魯花赤以告王
及齊國公主其書曰貞和宮主失寵使女巫
呪詛公主公主遣忽刺歹三哥車占歹等囚
宮主于螺匠家封其府庫賴柳墩力辨得釋
宮主自公主釐降恒居別宮與王絕不相通
公主薨忠宣受內禪奉迎王及宮主上壽宮
主生江陽公滋靜寧明順兩院妃忠肅六年
卒

淑昌院妃金氏尉衛尹致仕良鑑之女有姿

尉
尉

色嘗嫁進士崔文早寡齊國公主薨忠宣爲
世子疾幸姬無比專寵斬之欲慰解忠烈意
以金氏納之後封淑昌院妃忠烈薨忠宣祭
殯殿遂幸妃兄金文衍家與妃相對移時人
始訝之後十餘日移御文衍家蒸焉未幾進
封淑妃妃日夜百態妖媚王惑之不親聽政
遂命停八關會元皇太后遣使賜妃姑姑姑
姑蒙古婦人冠名時王有寵於皇太后故請
之妃戴姑姑宴元使宰樞以下用幣賀妃嘗

以四月八日張燈後園設火山具絃管以自
娛其黃簾繡幕皆供御之物觀者如市三日
乃罷妃嘗居母憂邀宴宰樞又如銀字院設
法會宰樞亦與焉時王在元妃或宴元使或
遊朴淵或如寺院飯僧出入無度車服衣仗
與公主無異

忠宣王薊國大長公主寶塔實憐元晉王甘
麻刺之女忠烈二十二年忠宣以世子在元
尚主二十四年公主自元來帝使太子阿木

宰丞相雍吉刺歹護行忠烈幸金郊百官郊
迎儀仗妓樂如迎王禮是年忠宣受禪號公
主宮曰中和府曰崇敬置官僚公主妬趙妃
專寵作畏吾兒字書付隨從闊闊不花闊闊
歹二人如元達于皇太后畏吾兒古回鶻也
元古無字八思巴始制蒙古字然往來書多
用畏吾兒字其書云趙妃詛呪公主使王不
愛王使朴景亮問二人書中事二人不應反
歐之王懼白忠烈忠烈幸公主所慰安之又

以所籍都成器金繡玄宗柱張祐等家產人
口賜闊闊不花闊闊歹章吉徹里等又以繡
妻賜闊闊不花欲解公主怒公主猶遣闊闊
不花闊闊歹與大將軍金精吳挺圭等如元
告之頃之有人貼匿名書於宮門云趙仁規
妻事神巫呪詛使王不愛公主而愛其女公
主下仁規及其妻子獄又囚仁規子瑞璉珞
女婿朴義盧頴秀等及妻又遣徹里如元告
貼榜事貼榜者乃司宰注簿尹彥周也上洛

伯金方慶等諸致仕宰相請公主乞留徹里
不從王又使人請之亦不聽闊闊不花等與
太后使者還自元以帝命囚崔冲紹及將軍
柳溫于巡馬所又囚趙妃元又遣使來鞠仁
規凡乘傳者百餘遂以仁規如元又鞠仁規
妻極慘酷妻不勝苦誣服元又遣使執趙妃
及宦者李溫以歸太后遣蕃僧五人道士二
人來赦公主呪詛又遣洪君祥享王欲使王
與公主合懽人謂王自尚主以來有歉夫婦

之道然嬪妾或進御有身故致妬忌之釁是
年忠烈復位王與公主如元二十七年忠烈
遣都僉議司使閔瑩表請改嫁公主瑩不敢
進而還語在世家三十二年王惟紹等譖于
皇后欲以瑞興侯璵改尚公主璵貌美忠烈
使之衮服數往來以觀公主公主素不謹每
與內僚諸人亂王益不屑故遂屬意於璵語
在惟紹傳王復位二年元封爲韓國長公主
五年與王還國王使順妃淑妃迎于金巖驛

高麗文卷八十九 十五
觀用幣宰樞亦如之僧徒亦迎拜獻幣公主
所乘車二兩飾以金銀錦絢後車五十兩氈
帳有大小大者可載十四車金瓮一鍾二大
鍾子六只里麻鍾子字藥只鍾子及盞兒各
十銀札思麻十四番瓶二大鍾子只里麻鍾
子各十字藥只鍾子十四察刺盞兒察潭盞
兒各六灌子二猪鬃瀉子及胡蘆各一搵金
四十錠二十九兩銀六十八錠三十四兩諸
器名皆蒙古語也車服斷送之盛前世所未

有忠肅二年公主如元帝遣院使闊闊歹等
迎之忠宣時在元請迎于道帝許之乃至薊
州之南迎之公主在元尋不豫太后遣院使
唐古歹問疾仍令侍疾未幾薨奉柩東還帝
命中書省御史臺百官奠于道明年喪至自
元百官玄冠素服迎于郊殯永安宮葬以禮
忠惠四年元追封薊國大長公主
懿妃也速真蒙古女生世子鑑忠肅王忠肅
三年薨于元還葬于國追贈懿妃

靜妃宗室西原侯瑛之女忠穆元年薨追贈靜妃

順和院妃洪氏南陽人府院君奎之女

趙妃祥原郡人平壤君仁規之女忠烈王十八年忠宣爲世子納以爲妃二十四年韓國公主姤妃專寵譖于元語在薊國公主傳

順妃許氏孔巖縣人中贊珙之女嘗嫁平陽公眩生三男四女眩死忠烈王三十四年忠宣納之及即位冊爲順妃後淑妃得幸順妃

別列

之女入侍皇太子謀辱淑妃白太子令淑妃赴都中郎將尹吉甫以擊毬得出入東宮故請於太子止之後元遣使賜妃姑姑百僚宴妃弟用幣以賀妃與淑妃不平至是王令淑妃往賀終宴之間二妃五出更衣以服飾相高忠肅後四年卒元遣完者來會葬忠肅王濮國長公主亦憐真八刺元營王也先帖木兒之女忠肅三年王在元娶之是年冬與王來六年薨殯于延慶宮追贈靖和公

主遣元尹任子松如元告計郎將李麟告計于營王營王遣使來弔喪皇太后亦遣中使於佺不花來弔七年葬明年元中書省遣宣使李常志來囚公主宮女胡刺赤女子及獲人韓萬福問公主薨故萬福云去年八月王昵御德妃於延慶宮公主妬被王歐鼻衄又於九月王如妙蓮寺歐公主於佺夫介等救之常志遂執胡刺赤女子及萬福等以歸白元恒朴孝脩等上書中書省辨萬福誣告是

年冬奉安公主真于順天寺忠惠四年元追封濮國長公主

曹國長公主金童元順宗子魏王阿木哥之女忠肅十一年王在元娶之明年與王來從王幸漢陽龍山生子是爲龍山元子未幾公主薨于行宮年十八元遣左司郎脫必歹來致奠忠惠四年元追封曹國長公主

慶華公主伯顏忽都蒙古女王在元娶之後二年與王來五年開府曰慶華置官屬王薨

忠惠再宴公主于永安宮公主亦邀忠惠宴及酒罷忠惠佯醉不出暮入公主卧内公主驚起忠惠使宋明理輩扶之使不動且掩其口遂蒸焉翌日公主恥之欲還于元使買馬忠惠命李儼尹繼宗等禁馬市不得賣馬元使頭麟等來進御酒于公主執忠惠以歸公主囚贊成事鄭天起于征東省仍命金之謙權征東省金資提調都僉議使司忠惠五年薨葬以禮恭愍十六年元贈謚肅恭徽寧公

主

明德太后洪氏南陽人府院君奎之女生而聰慧端恪王即位選入宮冊爲德妃動遵禮法王甚重之二年生子禎百官賀是爲忠惠王又生恭愍王後忠肅尚元濮國長公主以公主妬忌后出居定安公第王數夜幸之尹碩孫奇等密白王移御定安公第遷后於隣家以便往來有女巫以妖言出入后宮頗見信愛后尋知妖妄籍其財產令左右榜殺之

忠惠既即位忠肅聽鄭萬吉姜融金元祥讒
間遂勒后歸田里不許母子相見元執忠惠
以歸宰相享后以慰之后引見政丞蔡河中
曰卿爲首相見君之惡何不匡救以至於此
其阿諛順旨不一諫者徒欲固其祿位也今
王被執而去卿曾不遣一介奔問起居醜然
無恥今雖具酒食予何忍下咽泣而却之初
立府曰德慶及恭愍即位改號文睿尊爲大
妃元年王欲躬裸大室判書雲事姜保以陰

陽拘忌言今年不可親祀都堂責之曰祀大
事汝何沮之有姦臣告于后后固止之十年
王以紅賊逼京奉后南狩十五年德寧公主
享后于文睿府時辛旽方得幸勢甚熾從王
入見后不賜坐旽趨出王曰僉議國之柱石
何不賜坐后正色曰吾未亡人安敢與外僧
共坐王默然旽銜之讒聞百計十七年侍中
柳濯以諫馬巖役繫獄后使人諭王釋之王
不聽十八年夏旱王謁后語及旱灾后曰王

計
計

知天之所以旱耶去年不雨百姓餓死今又大旱民不聊生王孰與爲君奈何委政臣下多殺有功無罪之人大興土木以傷和氣乎王爲元子時百姓屬望惟恐王不爲君怨忠惠無道我亦以爲然忠惠時歲屢豐而殺人少今何反不及耶且王年非幼何假國柄他人手乎因泣下王有不豫色曰母后何彰子之過若是歟多殺人非臣之罪但禁亂臣耳目是王怨后眈之讒聞亦行孝遂衰十九年

太祖高皇帝遣尚寶司丞傑斯來錫王命又賜后段線羅紗王構佛宇上樑壓死者二十人肢體異處不可忍視后聞之請罷役不聽二十年眈伏誅王以濯爲眈黨將殺之后使人請赦王怒縛使者繫獄王以闕定省及后有疾乃往省之二十一年正月王上尊號赦二罪以下冊曰王化之本莫先於孝人子之職宜顯其親况聖善之有恩盍封崇之以禮恭惟王大妃夙傳家業克著母儀貞靜本

乎天資柔順形於日用配先考專治于內警戒無違保小子式至于今劬勞罔極年垂八秩位冠東闈以言其德則宗社之所由安以言其功則臣民之所共賴持蠶抱管雖未足以形容檢玉泥金庶小伸於愛敬考本朝之舊典遵歷代之通規謹率百官奉金寶玉冊上尊號曰崇敬王太后茂對鴻名誕膺鉅慶躋于萬壽祚我三韓改文睿府爲崇敬其年夏旱后使人告王曰天之以旱由人所召辛

屯黨人妻妾沒爲官婢者可令放之婦人何與焉王從之惟屯妻妾不赦二十二年王欲以辛禍爲嗣請就學命成均直講李崇仁授書后不欲托辭曰兒尚幼稍長就學未爲晚王曰臣今數窮當死今不立嗣社稷誰托且影殿之役誰繼吾志后曰影殿壯麗天下罕比勞民傷財莫甚焉水旱災變靡不由此宜罷其役又曰人臣出從王事入治家產而金興慶等諸子弟日夜在內不得歸家豈不怨

王王嘗偏信賊眈不聽予言幾至誤國今又若爾何耶宜令子弟輪番宿衛且萬機至煩宵旰勤政猶懼不及今王日中而起軍國之務豈無稽滯王宜夙興夜寐親聽國政以孝老母王不悅欲辭去后再三言之王對曰謹從命又問何不御妃嬪王曰無如公主者因泣下后笑曰一死理之常王亦終不免矣何慟之甚也恐爲人笑慎勿復然后數對王言過失王不悅宮人宦官相戒毋得言王過失

於后后亦知其然及聞王殺忠惠王孽子釋器佯不知乃曰昨夢見死屍心不平今膳夫備素膳以進二十三年九月甲辰王見弑后欲擇立宗室侍中李仁任率百官立禰三年倭寇江華恣殺虜后遣楊伯顏言於都堂曰倭賊肆暴屠害生民不可坐視今倭僧良柔等奉使而來可遣說賊曰汝亦人耳何殘忍之甚也汝欲金銀粟帛則我何惜焉雖土地亦當與之無徒殺人爲也以此開曉之如何

侍中慶千興曰是示弱也乃止五年禍乳媪張氏有罪百官請下獄禍使人問於后曰古亦有出乳母者乎后曰豈可以古今有無論但因時制宜耳百官固請禍不聽后曰豈可使一女之故令舉國缺望召張氏趣下獄張氏在禍前不出后怒命輦欲幸別宮禍由是竟出張氏六年春正月戊戌薨壽八十三前夕執禍手曰我國傳世之久將五百年大抵人君率不聽臣僚言願王稽大疑決大事必

咨侍中慶復興李仁任判三司崔瑩及諸相慎勿徑情直行又君舉必書不可數出遊觀二月葬今陵謚曰恭元恭讓王三年禮曹請曰忠肅王妃洪氏乃忠惠王恭愍王之母后忠惠王妃尹氏乃忠定王之母后以正統君王有後之妃迄今不祀實爲闕典乞二妃忌祭及真殿祭悉倣近代先后禮從之壽妃權氏福州人左常侍衡之女初嫁密直商議全信子衡以全家不肖欲離之而未果

侍中慶千興曰是示弱也乃止五年禍乳媪張氏有罪百官請下獄禍使人問於后曰古亦有出乳母者乎后曰豈可以古今有無論但因時制宜耳百官固請禍不聽后曰豈可使一女之故令舉國觖望召張氏趣下獄張氏在禍前不出后怒命輦欲幸別宮禍由是竟出張氏六年春正月戊戌薨壽八十三前夕執禍手曰我國傳世之久將五百年大抵人君率不聽臣僚言願王稽大疑決大事必

咨侍中慶復興李仁任判三司崔瑩及諸相慎勿徑情直行又君舉必書不可數出遊觀二月葬今陵謚曰恭元恭讓王三年禮曹請曰忠肅王妃洪氏乃忠惠王恭愍王之母后忠惠王妃尹氏乃忠定王之母后以正統君王有後之妃迄今不祀實爲闕典乞二妃忌祭及真殿祭悉倣近代先后禮從之壽妃權氏福州人左常侍衡之女初嫁密直商議全信子衡以全家不肖欲離之而未果

忠肅後四年托內旨絕婚遂納于王冊為壽
妃忠肅薨忠惠蒸焉後元年卒

忠惠王德寧公主亦憐真班元鎮西武靖王
焦八之女忠肅十七年忠惠在元尚公主生
忠穆王長寧翁主公主嘗請乾洞杜主於旻
天寺受戒忠惠薨忠穆幼冲即位公主方盛
年居中裴佺與康允忠出入得幸有人錄佺
罪惡貼匿名狀于版圖門公王召諸宰相曰
自今裴佺勿復近侍後佺猶在公主宮中用

公主

事忠穆不豫公主徙居密直副使安牧第庶
務皆取決王薨公主命德城府院君奇轍政
丞王煦攝行征東省事忠定時公主頗與政
王不能沮二年如元恭愍三年還王以主屬
為嫂事之甚謹供奉視三殿十六年元封貞
順淑儀公主卒禍元年薨葬頃陵三年附神
孝寺忠惠王真殿恭讓王二年附大廟
禧妃尹氏坡平縣人贊成事繼宗之女生忠
定王忠定元年立府曰敬順置丞注簿各一

舍人二忠定遜于江華供膳不充往來又絕
憂愁號泣妃請恭愍往見之留數日還卒禍
六年薨恭讓三年禮官建白妃之忌祭及真
殿祭悉倣近代先后從之

和妃洪氏評理鐸之女鐸爲慶尚道鎮邊使
王聞其女有姿色賜鐸衣酒後三年未納而
冊爲和妃置于宰臣尹忱第以便往來然臨
幸數日而寵絕

銀川翁主林氏商人信之女丹陽大君之婢

也賣沙器爲業王見而幸之有寵三年王將
納和妃林氏妬之乃封爲銀川翁主以慰其
意時稱沙器翁主王起三峴新宮其制度不
類王居庫屋百間實穀帛廊廡置絲女有二
女被選當入泣下王怒以鐵椎擊殺之又多
置碓磓皆翁主意也王好熱藥諸妃嬪皆不
能當御唯翁主得幸生釋器開福宴奪市人
帛爲幣王被執如元高龍普等封內帑翁主
泣曰王只著禮服不服重裘今寒甚願獻王

裴龍普許之龍普又放翁主等宮人百二十
六人

恭愍王徵懿魯國大長公主寶塔失里元宗
室魏王之女王在元親迎于北庭元封承懿
公主王即位與之東還置府曰肅雍元年王
欲躬裸大室公主勅王侍臣曰若等侍王詣
大廟則吾必罪之由是王不得行五年王幸
奉恩寺聽僧普虛說法公主從太后繼至侍
女僧徒雜還無別王又邀普虛于內殿公主

保
錄

太后喜泣下露襟親侑茶果公主施瑠璃盤
瑪瑙匙等物八年宰相白公主曰王即位九
年未有太子願選良家女充後宮公主許之
乃納李齊賢女爲妃寔非王意公主復悔之
不進膳於是闈豎女謁讒謗百端公主遂有
妬志十年避紅賊從王南幸事出倉卒去輦
而馬見者皆泣下明年興王之變王入太后
密室蒙毯而匿公主坐當其戶亂定王乃出
十四年二月王以公主有身彌月赦二罪以

下及難產病劇令有司禱于佛宇神祠又赦
一罪王焚香端坐暫不離側公主尋薨王悲
慟不知所爲贊成事崔瑩請移御他宮王曰
吾與公主約不如是不可遠避他處以圖自
便命王福命主喪事輟朝三日百官玄冠素
服設殯殿國葬造墓齋四都監各置判事使
副使判官錄事又設山所靈飯法威儀喪帷
輜車祭器喪服返魂服玩小造棺槨墓室鋪
陳真影等十三色各置別監以供喪事令諸

司設眞賞其豐潔者於是爭務華侈至有稱
貨以辦者王素信釋教至是大張佛事每七
日令群僧梵唄隨魂輿自殯殿至守門幡幢
蔽路饒鼓喧天或以錦繡蒙其佛宇金銀彩
帛羅列左右觀者眩眼遠近諸僧聞者皆爭
赴遣密直副使楊伯顏如元告喪四月壬辰
葬正陵群臣上號曰仁德恭明慈睿宣安王
太后將葬王命畫儀衛次第山陵制度觀之
不覺涕泗喪事依齊國大長公主例窮奢極

後以此府庫虛竭王惑浮屠說欲火葬侍中
柳濯不可乃止王手寫公主真日夜對食悲
泣三年不進肉膳今朝臣除拜及出使者皆
詣陵下如閣門行禮十五年大起公主影殿
于王輪寺之東南令百官輦木石數百夫挽
一木尚不能進呼耶聲動天地晝夜不絕牛
死者相繼于道十六年元遣前遼陽理問忽
都帖木兒賜公主謚曰魯國徽翼大長公主
王幸魂殿告錫命設大享教坊奏新撰樂詞

王坐對公主真侑食如平生後又幸正陵巡
視瑩域徘徊悲思御丁字閣奏胡歌獻酬尋
命改公主謚李仁復李穡遂改徽懿以聞從
之十九年置守陵戶納上田臧獲于雲岩寺
王與群臣同盟曰有國有家配匹莫重矧茲
內助之賢宜在不忘惟仁德恭明慈睿宣安
徽懿魯國大長公主分派天潢連芳戚晚禮
從親迎來嬪我家濟邠燕京既同甘苦迨及
東旋再定禍亂辛丑妖賊犯京播遷于南贛

成克復癸卯興王倉猝之變賊在跬步橫身
障蔽又其兇謀攘竊國璽乃能出奇密令收
護俾我國家式至今日比功提甲亦無忝焉
溫恭小心循蹈婦則慈祥惠愛克著母儀儆
戒相成多所匡救是宜終始共守宗祧乃以
彌月之辰竟殞厥身興言及此痛楚尤深上
國贈徽懿魯國大長公主之號群臣獻慈睿
宣安之謚葬于雲岩寺東麓號曰正陵神御
之所在城中者曰仁熙仰稽太祖以來歷代

成規增益光大期盡予心肆與群臣同發誓
願於仁熙殿立千手道場又以德泉庫寶源
庫延德宮永和宮永福宮永興宮屬之以備
供用又於寶源庫別置解典庫又將宮中所
御之物買布一萬五千二百九十三匹分給
州郡隨本多少以取息諸道諸色人匠合納
貢布并委寶源庫收掌雲岩寺納田二千二
百四十結奴婢四十六口以資冥福置陵戶
百有十四期至不替佛天在上宗社在下今

我同盟及後代君臣不遵此盟或有侵奪盜
用者神必殛之雲岩元係教宗今改昌化屬
禪宗又改光岩

惠妃李氏雞林人府院君齊賢之女魯國大
長公主無子宰相請納名家女宜子者於是
選入封惠妃洪倫韓安之強辱諸妃也妃拒
不從恭愍既見弑剃髮爲尼

益妃韓氏宗室德豐君義之女以選入封益
妃王嘗宴內殿妃起爲壽王怡然顧謂近臣

畏人譏欲以自掩也十三年立府曰慈惠置
官屬明年禍遜于江華百官奉傳國璽獻于
妃遂以妃教立禡子昌昌即位臺臣以妃及
惠妃慎妃俱非正嫡請只給歲祿明年我
太祖與諸大臣定策奉妃教迎立恭讓王王
尊妃爲貞淑宣明敬信翼成柔惠王大妃冊
曰爲之後者爲之子當推孝敬之心有是實
者有是名蓋舉尊崇之典此春秋之大義而
古今之通規恭惟王大妃系出蟬聯德符窈

寵先朝作配尋遭中否之運一旦主盟坐定
再安之策既廓除異姓之禍仍遂立宗親之
賢顧以眇末之資獲叨艱大之托化家爲國
實蒙補鍊之功順色承顏恒奉怡愉之養然
不進其嘉號曷足酬其至恩率籲衆情爰擇
穀旦謹奉冊寶上尊號曰貞淑宣明敬信翼
成柔惠王大妃殿曰敬慎誕膺休慶丕敘彝
倫象服是宜化益敦於正始眉壽無害福自
享於大平

鍊鍊
擇擇

禹確曰美如何耶及王得心疾今洪倫韓安
等強辱妃妃拒之王怒抽劍欲擊妃懼從之
自是倫等矯旨數往來妃亦知其詐然不拒
遂有身語在倫等傳辛禍時臺諫交章請殺
妃兩生子從之初中郎將金元桂収其子養
于家至是鞠之乃女也臺諫又請鞠妃禍不
許曰是章先君之失也恭讓王即位以王女
敬和宮主養于妃家命有司賜妃田
定妃安氏竹州人竹城君克仁之女十五年

以選入封定妃克仁爲同知密直與侍中柳
濯等上書諫馬巖役王大怒出妃歸第曰非
惡汝也惡汝父也尋召妃還洪倫韓安之強
辱諸妃也妃被髮徒跣欲縊死王懼而止幸
禍即位妃年少美而艷禍每戲之曰予後宮
人何無如母氏者乎數如妃所或一日兩三
至或夜至或至而不得入頗有醜聲聞於外
禍一日如妃所妃以有疾不梳不見妃見其
第判書安淑老女於禍禍納爲賢妃人謂妃

慎妃廉氏瑞原縣人曲城府院君悌臣之女
以選入封慎妃洪倫韓安之強辱諸妃也妃
拒不從恭愍既見弑削髮爲尼

恭讓王順妃盧氏交河郡人昌城君稹之女
元年十一月立爲順妃開府曰懿德置僚屬
三年三月都評議使司奏曰殿下受命中興
以正大位奉承宗廟社稷之祀中宮所以助
祭祀東宮所以重國本宜令有司舉行冊禮
以正名號又請追贈王大妃國大妃中宮三

高麗史卷八十九 三十三

代祖考以彰孝理從之七月追謚妃三代八月授妃竹冊金印妃生世子諱肅寧貞信敬和三宮主

4

列傳卷第二

